

# Friûl di Jevât

PAR CURE DA LA SOCIETÂT FILOLOGJICHE FURLANE

Vie Ascoli, 1, Guriza - tel./fax 0481533849 - gorizia@filologicafriulana.it - www.filologicafriulana.it

Incuintri ai 23 di Setembar a lis sîs sot sere in Cjasa Ascoli, in vie Ascoli 1 a Guriza



In ocasion da lis zornadis europeanis dal patrimoni culturâl e da lis lenghis, la Societât Filologjiche Furlane e organize un incuintri ai 23 di Setembar a lis sîs sot sere in Cjasa Ascoli, in vie Ascoli 1 a Guriza, par ricuardâ la figure di Otello Silvestri tai vincj agns da la muart. Ceste cunvigne e ven inmaneade in parie cu la Biblioteche Statâl Lisuntine e cul Comun di Guriza, inte suaze da lis manifestazions pe fieste da la Patrie dal Friûl; no sarà dome une comemorazion, il ricuart di un grant gurizan di adoizion, ma ancje une ocasion par presentâ progjets e iniziativis di prospetive che a cjalin al avignî.

La cunvigne si intitule "Otello Silvestri (1934-2002). Un bibliotecario europeo": un titul che no par câs al intint ricuardâ la ativitat di cui che al è stât par passe vincj agns diretôr da la inomenade biblioteche gurizane e da la riviste "Studi Goriziani", ma soredu la sô atenzion viers la funzion culturâl e sociâl da la biblioteche. L'intervent che al vierzarà l'incuintri al sarà chel di

## Otello Silvestri (1934-2002) Un bibliotecario europeo

Rudj Gorian ("Otello Silvestri: un bibliotecario statale dinamico e radicato nel territorio"), che al presenterà la figure di Silvestri: nassût a Orsarie di Premariâs tal 1934, al tacà a lavorâ inte biblioteche gurizane dal 1964, diventant diretôr, prime come rezent dal 1973 e po come titolâr dal 1983. Dilunc da la sô direzion, dal 1988 al 1995, si à di ricuardâ l'intervent di restaur dal Palaç Werdenberg, storiche sede dal istitût (e inmò prime dal Staatgymnasium e dal Seminari): ancje dilunc dai lavôrs i servizis al public da la biblioteche e forin simpri garantîts e chel al dimostre la atenzion pe funzion publice da la biblioteche tant che servizi a disposizion da la int, da la citât di Guriza e di dut il teritori gurizan. L'impegn di Otello Silvestri no si è

limitât a la Biblioteche Statâl Lisuntine: tal 1984, par cualchi mès, al è stât ancje diretôr da la Biblioteche Statâl di Triest e al è stât ancje responsabil dal Ufici pai bens libraris da la Regjon; al à vût scrit cetancj articui di interès bibliotecari e culturâl, jessûts su rivistis e publicazions no dome locâls; tra chescj, chei su lis bibliotechis dal Friûl sdrumadis dal Orcolat tal 1976 e publicâts su "Accademie e biblioteche d'Italia"; al à ancje scrit pes rivistis e pes publicazion da la Filologjiche e al è stât conseîr da la nestre Societât. L'incuintri al intint ancje ricuardâ - graciis al intervent "Gli "Studi goriziani" di Otello Silvestri" di Antonella Gallarotti - il so impegn te direzion da la storiche riviste da la Biblioteche Statâl Lisuntine, che Silvestri al tornà a fâ

slovene.

Ma la cunvigne e sarà ancje la ocasion par presentâ un progjet inovatif che al cjale une vore indevant: la jentrade dai "Studi Goriziani" intal sît rivistefriulane.it. Di chest al fevelarà Pier Giorgio Scippa, intant che Maria Chiara Visintin e presenterà "Le lingue di Gorizia: un progetto che cresce": la mostre permanente su lis lenghis dal Gurizan metude sù in Cjasa Ascoli, screade tal 2019, e ven cumò insiorade cui tescj par furlan, sloven, todesc e inglès. Un biel mût par celebrâ la Zornade europeane da lis lenghis, ch'e cole ai 26 di Setembar, e che si inseris ad inplen intun percors di preparazion al grant apontament dal 2025, cuant che Gnova Guriza e Guriza e saràn "capitâl europeane da la culture".

## Domenie ai 2 di Otubar la SFF a Spilimberc pal Congrès numar 99



Domenie ai 2 di Otubar dal 2022 la Societât Filologjiche Furlane si da adun a Spilimberc pal so XCIX Congrès sociâl. Pal Sodalizi e je la cuarte volte inte "citât dal mosaic", dopo dai congrès dal 1926, 1946 e 1984, che a àn traversât no dome la storie da la Filologjiche, ma dal Nûfcent furlan. "Tal 1926 - al ricuarde il president Federico Vicario - o passàrin l'aghe pe prime volte, come ch'al disè cun braure il president d'in ché volte, Pier Silverio Leicht; vincj agns dopo, che lis feridis da la vuere a jerin ancjemò viertis, il moment al jere dominât dal dibatiment politic sul avignî dal Friûl; chel dal 1984 al è stât il congrès di Novella Cantarutti, ricercjadore di etnografie e grande vòs da la poesie furlane dal Nûfcent. Avuè o sin

brauròs di tornâ in ceste maraveose citât dal Friûl di soreli a mont, che par mil resons e je centrâl pe nestre storie e pe culture". Chel di chest an al sarà ricuardât tant che il prin congrès che si davuelç finalmentri in maniere normâl dopo da la epidemie covid-19, ma ancje - come che al motive il sindic Enrico Sarcinelli - parcè ch'al cole insieme cul centenari da la Scuole Mosaiciscj dal Friûl, un istitût di formazion di impurtance fundamentâl, che si podarà visitâ pe ocasion. La zornade dal Congrès e tacarà a lis 9 a buinore cu la messe par furlan tal Domo di Sante Marie Maiôr, ch'e sarà celebrade di pre Italo Gerometta e compagne dai grops corâi Tomat di Spilimberc, San Marc di Pordenon e da la Cjantorie dal Domo di Vençon. A lis 10 si cjatîs te place dal Domo, li

che i sbandieradòrs e i tamburins di Spilimberc a daran il bon acet ai participants. A lis 10.30 tal Teatri Miotto a tacaran lis voris dal Congrès: dopo dal salût dai soestants a fevelaran Federico Lovison, cu la relazion "Spilimbergo. Secoli di bellezza in un'antica città del Friuli" e Angelo Bertani, che al presenterà la figure e la opare di doi grancj protagonistiscj da l'art furlane tant che Italo Zannier e Nane Zavagno. Si larà indevant cu la presentazion dal numar unic "Spilimberc" rincurât di Gianni Colledani e Marco Salvadori, une monografie che in passe 600 pagjinis e met adun 76 contribûts di 68 autòrs - ricercjadòrs e studiòs locâi e regionâi - che a resonin sui aspiets plu e mancun cognossûts dal teritori, dividûts in 7 sezions: ambient e nature, storie, art e architeture, economie e societât, int e associazions, lenghe, letature e musiche. Par sierâ la zornade, gustâ in compagne e visitis al centri storic cu la vuide in lenghe furlane e a la Scuole Mosaiciscj (daûr prenotazion li da la segretarie de Filologjiche, tel. 0432 501598 int. 1 - info@filologicafriulana.it).